



REGIONE AUTONOMA DELLA SARDEGNA

DELIBERATZIONE N. 12/15 DE SU 26.2.2008

Ogetu: Protzedura de verifica in cunforma a s'art. 31 de sa L.R. 18.1.1999 n.1 e s.m.i. e de sa Deliberatzione G.R. 15.2.2005 n. 5/11 e s.m.i. chi pertocat a su progetu "Impiantu mòbile de tratamentu de sas abbas chi protzedint dae atividades de bonìfica impiantu cracking in intro de s'istabilimentu de Assèmini" - Localidade Machiareddu. Proponet: TRS Servizi Ambiente S.r.l.

S'Assessore de sa Defensa de s'Ambiente relatat chi sa sotziedade TRS Servizi Ambiente S.r.l. at presentadu in die 16.11.2007 (protocollu assessoriale n. 0039765 de su 19.11.2007) su progetu, completadu a urtimera in die 21.1.2008, denominadu "Impiantu mòbile de tratamentu de sas abbas chi protzedint dae atividades de bonìfica impiantu cracking in intro de s'istabilimentu de Assèmini", chi si podet incluire in sas òperas de sas cales a s'Allegadu B1 de sa Deliberatzione G.R. n. 5/11, puntu 11, "Impiantos de eliminatzione e recùperu de refudos perigulosos, tràmite operatziones de sas cales a s'allegadu B e a s'allegadu C, literas de R1 a R9, de su Decretu Legislativu 5 freàrgiu 1997, n. 22". S'interventu est istadu sutapostu a sa protzedura de verifica in cunforma a s'articulu 23, commas 4 e 5 de su D.Lgs. 152/2006, sende chi est unu progetu chi pertocat a òperas de creze temporànea.

In su D.Lgs 4/2008, publicadu in sa Gazeta Ufitziale, 24 de su 29 ghennàrgiu 2008, sostitutivu de sa segunda parte de su decretu legislativu 152/2006, sa tipologia de interventu de su cale a s'ogetu s'incluit intre sas òperas de sutapònnere a sa protzedura de verifica (allegadu IV, puntu 7, litera z.a.).

S'interventu, su gastu complessivu de su cale est medidu in € 120.000, est funtzionale a bonificare e a isciuciare s'impiantu "cracking" (ETS) in intro de s'istabilimentu Syndial de Assèmini. Custa bonìfica incluit una filera de operatziones, intre sas cales su flussàgiu cun vapore e sa samunadura de sas lìnias e de sas

aparechiaduras. A fines de pòdere torrare a utilizzare a pustis de sa bonifica sas abbas chi abarrant dae sas atividades de samunadura, sa Sotziedade at prevididu s'impreu de un'impiantu mòbile pro su tratamentu de custas abbas matessi.

Su tratamentu chi at èssere fatu in s'impiantu mòbile est punnadu a s'eliminatzione de sos refudos de ògiu in fase separada e de sos sòlidos suspesos chi sunt in sas abbas de samunadura. A tratamentu acabadu sas abbas ant a èssere iscansadas pro s'eliminatzione definitiva in impiantios esternos.

Sas abbas de samunadura chi intrant in s'impiantu sunt classificadas comente refudos periculosos cun còdighe CER 16 07 08* (refudos de s'innetadura de barchiles pro trasportu e chistimentu de barriles chi cuntenent ògiu). Su periodu de funtzionamentu prevididu est de belle 18 meses. Sa capatzidade mèdia a gerronada previdida est parivile a ca. 40 m³/die.

S'impiantu mòbile at a èssere postu in intro de s'àrea de impiantu ETS subra una superfìtzia de ca. 100 m² e at a èssere costituitu dae sa unidades de tramentu chi sighint:

- unu filtru a cuartzite
- duos filtros a carbone ativu,
- pompa pro sas operatziones de contrasamunadura de su filtru a rena;
- cuadru elètricu de controllu;
- barchile dae 6 m³ pro fàghere càbere sas abbas pro sa contrasamunadura;
- barchile dae 6 m³ pro su chistimentu de sas abbas de contrasamunadura de aviare a eliminatzione.

Su servitziu Sostenibilitade Ambientale e Valutatzione Impatos (S.A.V.I.) pustis de s'esàmene de sa documentatzione, comente cumpletada in die 21.1.2008, leadu a cunsideru chi s'interventu permitit de reduire siat sos consumos de resursa idrica siat sa produtzione de sos refudos licuidos de eliminare, at concludidu s'istrutòria afirmende chi s'interventu non depet èssere sugetu a àteras protzeduras de VIA, cun sa condizione chi siant respetados sos òbligos chi sighint:

1. sas abbas chi protzedint dae sas operatziones de samunadura de s'impiantu ETS ant a dèpere èssere chistidas in unu barchile idòneu pro custa mira e pro s'ecualizatzione (cun capatzidade parivile a nessi 10 m³), frunidu de bartza de contenimentu (de capatzidade parivile a su barchile matessi), controllu de livellu a filtros a carbonnes ativos in linia cun s'ispiràlliu;

2. sas abbas tratadas in essida dae s'impiantu mòbile ant a dèpere èssere chistidas in unu barchile (cun capatzidade parivile nessi a 10 m³), subra su cale ant a èssere acumpridos sos controllos analiticos pro su controllu de protzessu e sa verìfica de s'idoneidade pro lu torrare a impreare;
3. su sistema de impermeabilizatzione de s'àrea in ue at a èssere postu s'impiantu mòbile (chi at a incluire finas s'àrea ocupada dae su barchile) at a dèpere èssere realizadu ponende suta sa geomembrana unu pìgiu de materiales chi potzat conduire s'abba cun unu valore de $\leq 10^{-9}$ m/s;
4. at a dèpere èssere garantida sa gestione curreta de sas abbas pròinas e de sos iscansos dàbiles casuales e atzidentales gasi comente decraradu in sa relata subra sos dannos a s'ambiente;
5. acabada sa campagna de atividade s'impiantu at a dèpere èssere bogadu. Sas conditziones de su giassu interessadu ant a dèpere èssere torradas a nou e a comente fiant in antis de s'interventu;
6. sa gestione de sos refudos, produidos in fase de atividade de s'impiantu (comente resùgios de ludu e carbones ativos) e in fase de dismissione (materiales chi cumponent su sistema de drenàgiu e impermeabilizatzione), at a dèpere èssere fata in cunforma a su D.Lgs. 152/2006 e s.m.i..

Premìtidu totu custu, s'Assessore de sa Defensa de s'Ambiente, leadu a cunsideru chi su Direttore Generale at espressadu su parre in favore de legitimidade, proponet a sa Giunta regionale de fàghere sua sa proposta de su S.A.V.I..

Sa Giunta regionale, cumpartzende su chi at propostu e bogadu a notu s'Assessore de sa Defensa de s'Ambiente

DELÌBERAT

- de non sutapònnere a una protzedura in prus de Valutatzione de Impatu Ambientale su progetu "Impiantu mòbile de tratamentu de sas abbas chi protzedint dae atidades de bonìfica impiantu cracking in intro de s'istabilimentu de Assèmini", presentadu dae TRS Servizi Ambiente IS.r.l, a condizione chi siant respetados e càbidos in su progetu sos òbligos indicados inoghe in premissa;
- de apostivigare chi, sende firmos sos òbligos de achirire sos àteros parres e autorizatziones dàbiles prevididos dae normas in vigèntzia, sa Sotziedade at a dèpere comunicare a su S.A.V.I. sa die de inghitzu de esertzìtziu de

s'impiantu e sa die de dismissione de su matessi e imbiare sos elaborados in ue si ponent in su progetu sos òbligos de sos cales a sa premissa.

Su servìtziu S.A.V.I. at a providire a sa comunicatzione de custa deliberatzione a sos suetos interessados a su protzedimentu, a totu sas Amministratziones chi ant cumpetènzias, finas in matèria de controllu ambientale, e a sa publicatzione in su Bulletinu Ufitziale de sa Regione Sardigna (B.U.R.A.S.).

Su Direttore Generale f.f.
Fulvio Dettori

Su Presidente
Renato Soru